

**Zeitschrift:** Akzent : Magazin für Kultur und Gesellschaft

**Herausgeber:** Pro Senectute Basel-Stadt

**Band:** - (2007)

**Heft:** 6: Schwerpunkt Partnerschaft : Pro Senectute Baselland und Basel-Stadt fusionieren

**Artikel:** Zwai halbi Kanteen, aber ... zwai ganzi Ständereet

**Autor:** Miville-Seiler, Carl

**DOI:** <https://doi.org/10.5169/seals-842944>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

**Download PDF:** 30.03.2025

**ETH-Bibliothek Zürich, E-Periodica, <https://www.e-periodica.ch>**

Zwai halbi Kanteen, aber...

# ...zwaiganzi Ständereet

S aidnessisch Parlament bestoet uus zwai Kammere: dr Nationalroot, wo im Proporzverfaare gweelt wird – Zaal vo de Sitz uffgrund vo dr Sterggi vo de Parteye – und dr Ständeroot, wo dr Majorz gilt, d.h. gweelt wird, wär in sym Kanton die maischte Stimmen erzyylt. Dr Nationalroot zellt 200 Mitgliider, dr Ständeroot 46, pro Kanton zwai und pro Halbkanton halt nummen ains. Uffgrund vo dr Bivelggerigssterggi schiggt dr Kanton Baselland siibe Verdrätter/innen in Nationalroot, dr Kanton Baselstadt numme fimf. Aber badi Halbkanteen hänn je ai Sitz im Ständeroot.

Vo de Ständereet erwartet me, dass si uff d Inträsse vo iire Kanteen luegen und die z Bäärn au verdrätte. Wenn ych uff my Zyt im Ständeroot zrugglueg, no han y als Landschäftler Kollege zeerscht dr Werner Jauslin gha, ab 1979 drno acht Joor lang dr Edi Belser und am Aend no dr René Rhinow. Mit alle han y guet kenne zämmeschaffe, wenn Aaliige vo unsere Kanteen zer Sprooch koo sinn.

Am ängschten isch die Zämmenaarbeit mit em Edi Belser gsi, wo halt vo dr glycche Partey gsi isch wien ych. Zämm hämmer in den andere Fraktioone gwoorben und gwaiblet fir dr EuroAirport, fir d Gotthard-Aggse bi dr Baan-Alpetransversale und geege s Atomgrafftwärgg Kaiseraugst. Nadyyrlig het s au Geigesetz gää: är het sich mee fir d Buuren yygsetzt und ych mi mee fir die stedtische Konsumänte, wenn s um Landwirtschaftspolitik gangen isch. Und badi hämmer drum kämpft, ass BL und BS solle Vollkanteen wärde.

Syder hänn anderi Lyt d Ständerootsmandat vo Basel-Stadt und -Landschaft verwaltet: dr Hans Fünfschilling fir BL, dr Gian-Reto Plattner und noo iim d Anita Fetz fir BS. Und wenn y uff däänen iiri Zyt zrugglueg, no gseen y, dass au si sich gfunde hänn, wenn Inträsse vo de baide Basel uff em Spiil gstande sinn. Mit Hilf vo den Aargauer und Solodurner hänn si d Bundesfinanzierig vom Wiisebäärgtunnel durebrocht, en aigeständigi Bundespolitik fir d Schiffaart, d Zämmenaarbeit vo dr ETH mit dr Basler Uni und e stergeri Finanzierig vo de Stedt, wo d Euro 08 durefiere. Das sinn nummen e bar Byspiil.

D Ständereet vo BS und BL: zwai vo 46. Aber im Ständeroot goot s vylmool nit aifach no Parteye. Wär s verstoot, Allianze z schmiiden und die rächten Argumänt vorbringt, dä findet fir bstimmte Aaliigen über d Fraktionsgränzen uusen Understitzig. Y bi sicher, dass die neygweelte Ständereet BL und BS vo Fall zue Fall wider miteinander schaffe.

Carl Miville-Seiler

